



NOVEMBAR 2017. • List RMU "BANOVICI"
BESPLATAN PRIMJERAK

RUDAR




**PROIZVODNJA UGLJA I OTKRIVKE
PREBAČAJ NA PROIZVODNJI UGLJA
U OKTOBRU OKO 20.000 TONA**



**FOND SOLIDARNOSTI
DODIJELJENA 21 STIPENDIJA DJECI
UMRLIH I POGINULIH RADNIKA RUDNIKA**



**SAMOSTALNI SINDIKAT RUDARA FBiH
U TOKU PREGOVORI OKO NOVOG
KOLEKTIVNOG UGOVORA**





RUDNICI MRKOG UGLJA «BANOVIĆI» d.d. BANOVIĆI
 Ulica Armije BiH 52, 75290 Banovići; Bosna i Hercegovina;
 Telefoni-Centrala: 00387 35 870-600; 875-818; Fax: 00387 35 875-166
 Rješenje Kartalnog suda Tuzla br: U1-0891/98 ID PDV broj: 209329630001
 Identifikacijski broj: 4209329630001 Poresni broj: 03421100
www.rnub.ba



Datum: 20.11.2017.g

INFORMACIJA O PREGOVARAČKOM POSTUPKU BEZ OBJAVLJIVANJA OBAVJEŠTENJA

U skladu sa članom 28. stav 4. Zakona o javnim nabavkama Ugovorni organ RMU "Banovići" d.d. Banovići objavljuje informaciju da u skladu sa članom 21. Stav 1. tačka a. Zakona o javnim nabavkama BiH provodi pregovarački postupak bez objave obavještenja o nabavci za nabavku "Usluge Nadzornog organa-"Inženjera" nad implementacijom Ugovora o inženjeringu, nabavci i izgradnji - EPC Ugovor (po sistemu „kjuč u ruke“) za Termoelekttranu Banovići, blok 1-350 MW broj 1669/15 od 24.11.2015.godine (broj nabavke: C-U 65/17).

Tenderska dokumentacija se nalazi u RMU "Banovići" d.d. Banovići, Služba nabave, ul. Armije BiH 52, 75 290 Banovići i dostupna je za sve zainteresirane kandidate.

Tenderska dokumentacija se može preuzeti i putem e-maila: javne.nabavke@rnub.ba uz obavezno dostavljanje zahtjeva za izuzimanje tenderske dokumentacije za predmetnu nabavku putem e-maila sa navođenjem podataka o nazivu i adresi firme-podnosioca zahtjeva.

DIREKTOR



[Signature]
 Dražica Munđer Cergić dipl. inž.rud

Transakcijski računi:

161 0250 007 190075	Ratfisen bank d.d. BiH, filijala Tuzla	306 0450 000 183538	Hypo Alpe Adria bank Bosnia d.d.
132 1300 309 179345	NLB Banka d.d. Tuzla, filijala Banovići	140 4010 018 681113	Sberbank BH d.d. Sarajevo
187 2000 000 044917	Postbank BH d.d. Sarajevo, filijala Žrnovica	186 0001 048 962098	Turkiah Ziraat bank Bosnia d.d.
154 3602 003 310866	Intesa Sanpaolo banka d.d. BiH	338 4402 212 197081	UniCredit banka d.d. Mostar
555 2030 048 467130	Nova banka AD Banja Luka, ekspozit. Tuzla		



TERMoeLEKTRANA BANOVIĆI, BLOK 1-350MW
THE THERMAL POWER PLANT BANOVIĆI, UNIT 1-350MW



PROIZVODNJA UGLJA I OTKRIVKE

PROIZVODNO FINALE U RUDNIKU „BANOVIĆI“



Početak mjeseca septembra zvanično je krenula sezona povećane proizvodnje i potražnje za ugljem. Dobro je poznato da je ovaj period godine najaktivniji i da treba ispunjavati ali i prebacivati proizvodne planove kako bi se ispeglali i nadomjestili rezultati, ali i napunila kasa preduzeća.

Proizvodni kiksevi nisu dozvoljeni, a zaostaci se ne mogu ničim pravdati, jer sve potrebno za proizvodnju mora pravilno funkcionisati.

Sumirajući rezultate u RMU „Banovići“, posebno proteklih nekoliko mjeseci, može se zaključiti da preduzeće posluje bez većih problema. U mjesecu septembru proizvedeno je nešto manje uglja u odnosu na plan, ali to nije ostavilo velike posljedice na kumulativni rezultat preduzeća koji se kreće u okviru planiranih količina.

Septembarska proizvodnja uglja iznosila je 134.025 tona, što je 93,26% u odnosu na plan. Razlozi neispunjenja plana su zastoji i remontirani na Separaciji uzrokovani opterećenosti proizvodnih kapaciteta. Realizacija otkrivke prebačena je za 30 procenata, odnosno proizvedeno je 1.070.670 metara kubnih čvrste mase.

Da se pogon separisanja stabilizirao i da je tehnološki spreman za proizvodnju pokazuje mjesec oktobar u kome nije bilo prostora za poslovanje ispod plana.

Prebačaj od 35% nije novost već logičan slijed rezultata prethodnih nekoliko mjeseci.

Kontinuirano dobra proizvodnja najavljena je i za mjesec novembar.

- Oktobar smo završili sa dobrim rezultatima, istim, a možda i jačim tempom, krenuli u novembar. Ukoliko bez problema realizujemo zacrtane ciljeve do kraja mjeseca mogli bi očekivati i 100% ostvarenje proizvodnje na kumulativnom nivou – rekao je izvršni direktor za tehničke poslove dr. Ibrahim Lapandić.

Visoko postavljeni proizvodni ciljevi prema najavama mogli bi se značajno prebaciti. Očekuje se proizvodnja od oko 170.000 tona separisanog uglja iako je planom za ovaj mjesec predviđeno proizvesti 143.710 tona.



RMU „BANOVIĆI“ D.D. BANOVIĆI NA LISTI NAJUREDNIJIH PLATIŠA

Prema informacijama Uprave za indirektno oporezivanje 10 kompanija iz BiH u prvih šest mjeseci ove godine uplatilo je ukupno 388 miliona KM PDV-a, što je ujedno i najveća uplata PDV-a u BiH. Među deset najurednijih platiša je i rudnik „Banovići“, koji je u najvećoj mjeri ispunjavao sve svoje obaveze i poštovao zakonske propise iz indirektnog oporezivanja, te tako dao svoj doprinos u prikupljanju prihoda od indirektnih poreza.

Uredne platiše dale su motiv za formiranje tzv. „bijeje liste“ obveznika koji će, prema riječima UIO, imati određene prednosti prilikom sklapanja budućih poslovnih transakcija.

JAMA SPREMNA ISPUNITI OVOGODIŠNJI
PROIZVODNI PLAN

OPTIMISTIČNA I DUGOROČNA PROGNOZA



Sagledavanjem stanja u „Podzemnoj eksploataciji uglja” može se ustanoviti da se intenziviranje poslova na proizvodnji dočekalo spremno. Rukovodstvo pogona smatra da će konstantnim planiranjem, radom i disciplinom biti moguće proizvesti i na tržište plasirati dovoljne količine kvalitetnog jamskog uglja.

Trenutno se vrše radovi na mehanizovanom otkopavanju uglja u OP Z6 i prema procjenama trajat će do mjeseca juna naredne godine, ali to svakako zavisi od dinamike napredovanja poslova i uslova rada.

Osim stalnih poslova na eksploataciji uglja, pripremanju novih otkopnih polja, rekonstrukciji i sanaciji pojedinih prostorija, uporedo se radi i na istraživanju revira „Sjever” izradom istražnih prostorija. Istraživanje revira „Sjever” jedan je od glavnih preduslova za plansko povećanje proizvodnje u narednim godinama sa sadašnjih 450.000 tona separisanog uglja na 750.000 tona.

Snage su usmjerene na 2021. godinu kada se, figurativno rečeno, u RMU „Banovići” očekuje proizvodna revolucija.

Pored akcenta koji je stavljen na proizvodnju uporedo se radi i na nabavci moderne opreme kojom se iz dana u dan nastoji olakšati rad u jami, a ujedno i stvoriti preduslovi za ostvarenje većih proizvodnih rezultata. U prethodnom periodu nabavljen je kombajn za mehanizovanu izradu jamskih prostorija, četiri grabuljasta transportera i dva gumena trakasta transportera. Nova oprema osigurala je pouzdaniji transport uglja sa pripremljenih, otkopnih i aktiviranih istražnih radilišta u jami.

Pokrenuta je i procedura oko nabavke dva nova kombajna za mehanizovano pripremanje prostorija. Stavljanjem u upotrebu novih kombajna ubrzati će se radovi na pripremanju otkopnih polja i omogućiti bolja usklađenost sa radovima na mehanizovanom otkopavanju uglja kako u ovoj tako i u narednim godinama.

Pored nabavke opreme radi se i na popunjavanju i osposobljavanju adekvatnog kadra. U jami je u julu završen prijem i obuka novih 110 radnika raspoređenih u četiri varijante. Ovim prijemom ostvarena je popunjenost radilišta radnom snagom u skladu sa predviđenom tehničkom dokumentacijom.





SAMOSTALNI SINDIKAT RUDARA U FEDERACIJI BOSNE I HERCEGOVINE

PREGOVORI OKO KOLEKTIVNOG UGOVORA



Sindikalna organizacija RMU „Banovići“ d.d. Banovići aktivno učestvuje u izradi novog Kolektivnog ugovora o pravima i obavezama poslodavaca i radnika iz oblasti rudarstva u Federaciji BiH. Naime, Kolektivni ugovor o pravima i obavezama poslodavaca i radnika iz oblasti rudarstva u FBiH zaključen je 8.9.2016. godine, a objavljen u Sl. Novinama FBiH 72/16 14.09.2016. godine na period od godinu dana. Odredbama člana 78. Kolektivnog ugovora određeno je da će se Kolektivni ugovor, ukoliko se u prethodnom periodu ne sačini novi, primjenjivati još najduže 90 dana. Obzirom na ove odredbe Kolektivni ugovor je na snazi do 14.12.2017. godine do kada je neophodno sačiniti novi.

U protekla dva mjeseca Sindikalna organizacija putem Samostalnog sindikata rudara u FBiH u saradnji sa Samostalnim sindikatom radnika rudnika uglja u FBiH aktivno učestvuje u izradi novog Kolektivnog ugovora. Ono na čemu insistira Sindikalna organizacija RMU „Banovići“ je preciznije definisanje radne sedmice, čije se trajanje od 40 sati ne može primijeniti u industrijskoj varijanti, obzirom da je Zakonom o radu utvrđeno da se dnevni odmor u trajanju od 30 minuta ne uračunava u radno vrijeme.

Pored toga, zahtjevi Sindikalne organizacije RMU „Banovići“ su preciznije definisanje takozvanih „prazničnih nadnica“, jer se praznici utvrđeni Zakonom o praznicima ukoliko padaju na dane vikenda (subota i nedjelja), odlukom Federalnog ministarstva za rad i socijalnu politiku, prenose na naredne radne dane, čime su radnici u industrijskoj varijanti na određeni način oštećeni. U proteklom periodu, u tim slučajevima uvijek se tražio dogovor sa poslodavcem. Stav Sindikalne organizacije je da se ta oblast uredi Kolektivnim ugovorom. U ovom segmentu zahtjev Sindikata je da se trećoj smjeni koja radi na dan 31.12. smjena računa kao praznična bez obzira što počinje prije 01.01., odnosno prije nastanka Nove Godine.

U pogledu visine satnice zahtjev Sindikata je da se trenutna visina satnice sa 2,40 KM uveća na 2,50 KM, a da se korekcija koeficijenta složenosti poslova može vršiti isključivo uz prethodnu saglasnost Sindikalne organizacije.

Ono što su sindikalni predstavnici saznali u toku pregovora je i to da je u ostalim rudnicima ukinut topli obrok, odnosno restorani, a da se ta vrijednost zaposlenicima isplaćuje u novcu. Pored toga u drugim rudnicima ukinut je i ugovoreni prevoz radnika na posao.

Stavovi Sindikalne organizacije RMU „Banovići“ u pogledu ovih odluka su da iste imaju svoje prednosti i svoje mane.

Ukidanjem toplog obroka neophodno bi bilo ukinuti OJ „Standard i usluge“ gdje bi se pojavio višak zaposlenika iz te organizacione jedinice. Ukoliko bi se i dogovorili sa poslodavcem o zbrinjavanju tog broja zaposlenika, njihovim prerasporedom na druge poslove došli bi u situaciju da zaposlenici u industrijskoj varijanti moraju nositi sa sobom topli obrok, što bi značilo vraćanje na period rudarenja iz prošlog vijeka. Zbog toga su mišljenja podijeljena, tako da će Sindikat u slučaju potrebe za donošenjem takve odluke anketirati radnike RMU „Banovići“ te zauzeti stavove u skladu sa mišljenjem većine.

U pogledu ukidanja organizovanog ili ugovorenog prevoza radnici bi dobijali mjesečnu naknadu za prevoz što bi predstavljalo pravičniju odluku, tako da bi i oni koji godinama koriste vlastiti prevoz imali određenu naknadu. Pored toga u prijedlogu Zakona o porezima predviđeno je da se i na troškove prevoza zaposlenika plaćaju doprinosi. U praksi bi značilo da radnici koji putuju sa udaljenijih mjesta imaju veće naknade za prevoz, što bi im ulazilo u penzijski osnov, dok radnici koji ne koriste prevoz u tom slučaju, praktično, postaju oštećeni. Zbog toga Sindikat u toj oblasti vrši detaljne analize nakon kojih će se zvanično opredijeliti u pogledu ugovorenog prevoza.

RADOVI U BANOVIĆIMA NA VIŠE LOKACIJA

„TRGOVAČKA ZGRADA“ U NOVOM RUHU

Banovići su u samo posljednje tri godine postali veliko gradilište prije svega zahvaljujući činjenici da su se pravi ljudi našli na pravom mjestu.

Naime, kada su Banovići 2014. godine dobili svoje poslanike na državnom, federalnom i kantonalnom nivou dio kolača koji pripada Banovićima nije olako prepuštan drugima, kako se to radilo u prethodnom periodu. Sinhronizovano su djelovali sa Općinskim načelnikom i Općinskim vijećem, kako bi za Banoviće obezbijedili pripadajuća sredstva sa svih nivoa vlasti.

Dokaz za to su mnogobrojni projekti koji su se realizovali ili se realizuju na području naše Općine, počev od uređenja korita rijeke (kod Općine i gradskog parka), izgradnje prilaznog puta na ulazu u Banoviće, kružnog toka, uređenja školskih objekata, dječijeg obdaništa, te mnogobrojnih infrastrukturnih i drugih objekata.

Jedan od takvih projekata je i uređenje stambene zgrade u ulici Alije Izetbegovića (od broja 11 do broja 19), kod banovićana poznate kao „trgovačka zgrada“. Smještena u užem jezgru grada predstavljala je ruševinu sa koje su već počeli otpadati dijelovi fasade izazivajući opasnost za prolaznike, a danas jedna je od najljepših stambeno-poslovnih objekata u Banovićima.



Ovo je treća stambena zgrada koja je po programu utopljanja obnovljena sredstvima kantonalnog i općinskog budžeta, te sredstvima etažnih vlasnika. Ranije su po tom sistemu obnovljene zgrada Socijalnog i zgrada u ulici Patriotske lige.

Uređenje „trgovačke zgrade“ započelo je potpunom sanacijom krova u vrijednosti oko 70.000 KM. Sredstva su obezbijedili etažni vlasnici koji su na inicijativu izvođača radova Upravitelja „MONT - FASADEN“ d.o.o. Banovići uplatili avans od 50% ukupnih obaveza prije početka radova, dok će ostatak plaćati u više mjesečnih rata.

Nakon sanacije krova, Općinski načelnik raspisao je tender za uređenje fasade, što je finansirano iz općinskog i kantonalnog budžeta u vrijednosti oko 107.000 KM. Kao najpovoljniji ponuđač izabrano je preduzeće „MONT - FASADEN“ d.o.o. Banovići, a pomenuti radovi su u završnoj fazi. Iako tek djelimično urađena „trgovačka zgrada“ znatno je izmjenila sliku užeg jezgra grada.

Radovi na objektu imali su višestruke efekte. Prije svega naišli su na oduševljenje građana kojima se polako vraća vjera u postojanje Upravitelja što je obaveza iz Zakona o korištenju, upravljanju i održavanju zajedničkih dijelova i uređenja zgrade. Prema riječima Upravitelja novo ruho zgrade izazvalo je i određenu pozitivnu ljubomoru kod etažnih vlasnika drugih objekata, koji iskazuju veliko interesovanje za uređenjem svojih stambenih zgrada. Nadamo se da će ovakvi primjeri probuditi svijest skeptičnih građana, koji će početi ispunjavati svoje obaveze shodno zakonskim propisima iz ove oblasti, jer se samo na taj način može doći do ljepše lokalne zajednice.

„MONT - FASADEN“ d.o.o. Banovići pokazao se kao pozitivan primjer upravljanja i poslovanja u Banovićima. Preduzeće je osnovano 2011. godine sa certifikatom za Upravitelja, a danas upošljava 17 radnika.

REKONSTRUKCIJA ZGRADE „SAMAČKA“

U sklopu projekta provođenja mjera energetske efikasnosti je i sanacija zgrade „Samačka“ na kojoj su izvedeni radovi izgradnje krova sa termoizolacijom. Projekat izgradnje krova koštao je oko 163.800 KM, a sredstva su obezbijedena učešćem Ministarstva prostornog uređenja i zaštite okoliša TK i općine

Banovići. Za očekivati je da će se zajedničkim sredstvima ova dva subjekta slijedeće godine izvršiti potpuna sanacija „Samačke“. Stavljanjem u funkciju prostorija zgrade obezbijedit će se prostor za potrebe nevladinih organizacija, udruženja građana, javnih ustanova, kao i privatnih poduzetnika.

Ugovorom potpisanim između općine Banovići i organizacije „World Vision BiH“ u sklopu „Samačke“ renovirat će se i prostorija za mlade. Istim Ugovorom finansirana je i zamjena stolarije u područnoj Osnovnoj školi „Repnik“ i saniranje mokrih čvorova u područnoj Osnovnoj školi „Oskova“.



IZGRADNJA ANEKSA DOMA ZDRAVLJA BANOVIĆI

Saradnjom Američke ambasade i općine Banovići započela je izgradnja Aneksa doma zdravlja Banovići koji će sadržavati novih 500 m² korisnog prostora za pružanje kvalitetnih zdravstvenih usluga građanima. Cijena projekta je oko 379.000 KM. Objekat će biti izgrađen u dvije faze, prva faza obuhvata zidanje i pokrivanje objekta te ugradnju stolarije, a druga izgradnju termofasade i unutarnje uređenje prostorija.



REKONSTRUKCIJA I SANACIJA OBJEKTA JU O.Š. „GRIVICE“

Sa Američkom ambasadom općina Banovići realizovala je i projekat rekonstrukcije i sanacije JU O.Š. „Grivice“ u vrijednosti oko 600.000 KM.

U okviru projekta izvršena je kompletna rekonstrukcija škole, zamijenjen krov, stolarija, urađena termofasada, opremljena unutrašnjost zgrade, grejne i elektro instalacije, te uređeno dvorište škole.



Pored navedenih projekata koji se provode u gradskoj sredini, mnogobrojni su započeti i u ruralnim naseljima, odnosno okolnim mjesnim zajednicama. Tu prije svega treba istaći sanaciju šteta nastalih na infrastrukturnim objektima i vodotocima tokom elementarnih nepogoda, zatim rješavanje vodosnadbjevanja u pojedinim mjesnim zajednicama kao i asfaltiranje određenih dionica puta.

Svi ovi projekti, kao i mnogobrojni drugi planirani za naredni period, provode se isključivo zbog stvaranja povoljnijeg ambijenta za život građana Banovića što je prvoshodno cilj Općinskog vijeća i Općinskog načelnika Banovića. Da ovakav razvoj lokalne zajednice proizvodi pozitivne efekte ukazuje i činjenica da je problem migracije stanovništva najmanje izražen u našoj lokalnoj zajednici u odnosu na okruženje.

NAKON OSAM GODINA U POGONU „ŽELJEZNIČKI TRANSPORT“ PONOVO POKRENUTA LIVNICA

OD RUDARSKOG OTPADA IZLIVENO PRVIH 150 KOČIONIH PAPUČA ZA VAGONE I LOKOMOTIVE



Rekonstrucijom zastarjelih i otpisanih mašina za livenje u pogonu „Željeznički transport“ nakon više od osam godina odrađeno je prvo livenje kočionih papuča za vagona i lokomotive. Iako se ovaj proces u posljednje vrijeme smatrao ekonomsko neisplativim ponovno pokretanje livnice pokazalo je drugačije rezultate.

Nagomilani rudarski otpad iskorišten je za proizvodnju prvih 150 kočionih papuča, materijala je preostalo za još tri livenja, odnosno za još najmanje 450 pozicija. Sa nula troškova osigurani su potrebni dijelovi za nastavak nesmetanih radova lokomotiva koji su se ranije nabavljali od drugih firmi, po visokim cijenama i dugim rokovima isporuke.

Kako bi se posao što bolje obavio i dobio finalni proizvod za potrebe livnice radnici su u funkciju vratili i mašinu za sačmiranje koja služi za čišćenje izlivenog materijala.

Trenutno je situacija takva da se u pogonu tačno zna koliko je preostalo rezervnih pozicija, ne prave se zastoji i proizvodi se ovisno o potrebama. U vlastoj režiji proizvode se i specijalistički odlivci koje je teško i

skupo nabaviti. Na ovaj način nastoji se uštedjeti određeni novčani iznos koji se može preusmjeriti za nabavljanje druge opreme.

U ovome eksperimentalnom projektu u ulozi livca bila su samo dva radnika. Avdihodžić Suad i Ajišić Nedžad jedini su preostali u Rudniku koji poznaju ovaj zanat i kojima se ponovo pružila prilika da pokažu svoje sposobnosti. Nakon zatvaranja livnice prije osam godina njihovo zanatsko umijeće stavljeno je u drugi plan, kada su prebačeni na druge poslove. Pokretanjem livnice po potrebi se vraćaju na prvobitna radna mjesta i uz pomoćne radnike trenutno mogu obavljati poslove livenja za potrebe Rudnika. Problem će nastati kada ne bude kvalitetnih majstora koji će ih naslijediti u ovom poslu, obzirom da za nekoliko godina odlaze u penziju.

Nedostatak adekvatnog kadra nije problem samo na poslovima livenja, jer se vrijednost starih produktivnih zanata sve više baca u drugi plan. To je primijetio i tehnički rukovodilac pogona Davorin Zarić.

- Nama nije cilj da naručujemo nešto što možemo sami proizvesti i ne mogu da se pomirim sa

činjenicom da se gase ovako vrijedna proizvodna / majstorska zanimanja. U Rudniku je i samo jedan kovač koji zbog invalidnosti trenutno obavlja druge poslove, ali priskoči u pomoć kad zatreba. U narednom periodu neće biti moguće osloniti se na mlađe generacije kojima ostaje ovaj Rudnik. Ovdje postoji dobra i jaka zanatska tradicija i prostor da se nastavi u tom pravcu, samo je potrebno raditi na tome – rekao je Davorin Zarić.

I pored novouvedenih aktivnosti pogon „Željeznički transport“ dobro funkcioniše i u proizvodnom smislu. U vrijeme povećane proizvodnje uglja bez problema odgovara svim postavljenim zadacima.

Problem u budućnosti mogao bi biti nedostatak lokomotiva zbog prevoza jalovine vagonima, obzirom

da su lokomotive stare oko 40 godina i da ih je sve teže održavati. Prema najavama menadžmenta nova lokomotiva uskog kolosijeka trebala bi stići već tokom naredne godine što će svakako osvježiti vozni park „Željezničkog transporta“.



TTU „ENERGETIK“ D.O.O. TUZLA

ODRŽANA PETA REDOVNA SKUPŠTINA DRUŠTVA



U prostorijama TTU „Energetik“ Tuzla 27. oktobra održana je peta redovna sjednica Skupštine na kojoj su razmatrana i usvojena osnovna pitanja djelovanja preduzeća.

Na sjednici je razmatrano pet tačaka dnevnog reda. Pored izbora radnih tijela Skupštine razmatrane su i doneše Odluke o usvajanju Godišnjeg izvještaja Društva koji uključuje Finansijski izvještaj, Izvještaj revizora i Nadzornog odbora. Također je razmatrano i donošenje Odluke o načinu pokrivanja ostvarenog gubitka u 2016. godini, kao i donošenje Statuta o izmjeni Statuta Tvornice transportnih uređaja „Energetik“ d.o.o. Tuzla, te donošenje Etičkog kodeksa Društva. Sve tačke dnevnog reda usvojene su sa 100% glasova ZA.

Uz članove Nadzornog odbora i Uprave Društva sjednici su prisustvovali predstavnica JP „Elektroprivreda BiH“ Amira Švraka, kao i predstavnik rudnika „Banovići“ Samir Numanović.

Iako je preduzeće osnovno krajem 2016. godine već sada bilježi ozbiljne poslovne rezultate. Tokom 2017. godine bez problema nastavljena je realizacija ugovorenih poslova značajne vrijednosti. Samo za potrebe JP „Elektroprivreda BiH“ odrađeni su poslovi u vrijednosti od 6 miliona KM (grabuljasti i trakasti transporter i dr.), dok je udio ostalih poslova oko milion KM. Sve ugovoreno u dosadašnjem periodu odvija se u skladu sa utvrđenom dinamikom, a poslovi vezani za Koncern EP BiH realizovani su i prije roka.

Pored proizvodnje na domaćem tržištu TTU „Energetik“ Tuzla u skorijoj budućnosti svoje proizvode lansirat će i na ino tržište. Potpisani su ugovori sa Holandijom, Norveškom i Švedskom, a u pregovorima su i poslovi vezani za tržište Srbije, Slovenije i Austrije. Kako iz Uprave navode svakodnevno se radi i na tehnološkom napretku preduzeća, jer to zahtijeva povećan obim poslova i proširenje tržišta.



„RUDARIJADA 2017“



RMU „BANOVIĆI“ NOSIOCI TITULE SVEUKUPNOG POBJEDNIKA

Svečanim defileom ekipa učesnica, polovinom mjeseca oktobra, zvanično je otvorena „Rudarijada 2017“ i najavljen još jedan uzbudljiv dan. Sportsko takmičenje rudara ove godine održano je u Živinicama, a u ulozi domaćina bili su RMU „Đurđevik“.

Otvaranju Rudarijade prisustvovali su brojni zvaničnici i gosti, a učesnicima su se obratili predsjednik Samostalnog sindikata rudara FBiH dr. Safer Mušanović, predsjednik Samostalne sindikalne organizacije RMU „Đurđevik“ Suad Šehić i načelnik općine „Živinice“ dr. Samir Kamenjaković.

Takmičilo se deset ekipa u šest sportskih disciplina, i to: šahu, stonom tenisu, natezanju konopca, odbojci za žene i muškarce, malom nogometu, te po prvi put ove godine i streljaštvu. Snage su odmjerile ekipe iz: RMU „Banovići“, RMU „Đurđevik“, Rudarskog instituta Tuzla, Rudarskog fakulteta Tuzla, Rudnika soli Tuzla, Rudara Tuzla, Željeznica Federacije BiH,

Geoservisa Živinice, Općine Živinice i PU Živinice. Branioци titule i apsolutni lideri ponovo su bili predstavnici RMU „Banovići“ koji su kao sveukupni pobjednici prelazni pehar zadržali u svom kolektivu. Na drugom i trećem mjestu u sveukupnom poretku našli su se predstavnici RMU „Đurđevik“, odnosno Rudnika soli Tuzla.

Kada su u pitanju pojedinačne discipline konopaši RMU „Banovići“ zadržali su vodeću poziciju i tako dali domaći zadatak ostalim ekipama za narednu godinu. Drugi u ovoj disciplini bio je Rudnik soli Tuzla, a treći RMU „Đurđevik“. Banovićki odbojkaši također su izašli kao pobjednici još jednom dokazavši svoje vještine u ovoj sportskoj disciplini. Za sobom su ostavili ekipe iz Željeznica FBiH i RMU „Đurđevik“. U disciplini odbojka za žene najbolje su bile djevojke iz



Rudnika soli Tuzla, drugo mjesto zauzele su odbojkašice Instituta Tuzla, a treće mjesto pripalo je odbojkašicama RMU „Banovići“.

Najatraktivnija sportska disciplina svakako je bila mali nogomet. Najbolju ekipu imao je Geoservis Živinice, zatim Rudarski fakultet Tuzla, a na trećem, ništa manje vrijednom mjestu, bili su banovički nogometaši.

Stonotenisai Rudarskog fakulteta Tuzla zauzeli su prvo mjesto, drugo mjesto ekipa RMU „Banovići“, dok je treća bila ekipa Željeznica FBiH. U novoj ovogodišnjoj disciplini „streljaštvu“ najbolja se pokazala ekipa Rudnika „Đurđevik“, u stopu ih je pratila ekipa iz Rudnika „Banovići“ i Rudnika soli Tuzla.

Nakon zanimljivih utakmica i uzbuđljivog dana učesnici su se u večernjim satima opuštali u

đurđevičkom restoranu Estrada, gdje su proglašeni pobjednici, dodijeljeni pehari i diplome za najbolje ekipe i pojedince „Rudarijade 2017“. Druženje istog motiva i u istom sastavu zakazano je i za narednu godinu.



ZNAČAJAN PODSTICAJ ZA UČENJE I RAD

DODIJELJENE STIPENDIJE DJECI UMRLIH I POGINULIH RADNIKA RMU “BANOVIĆI” D.D. BANOVIĆI

Ugovori o stipendiranju između Fonda solidarnosti RMU “Banovići” i djece poginulih i umrlih rudara ovog preduzeća potpisani su 18. oktobra u prostorijama Direkcije Rudnika. Dodijeljena je ukupno dvadeset i jedna stipendija, a Ugovore sa učenicima i studentima potpisao je predsjednik Fonda Suljo Kukić.

- Fond solidarnosti najbolje pokazuje da nismo zaboravili na naše radnike. Danas smo njihovoj djeci dodijelili sedam stipendija za osnovnu školu, pet za srednju školu i devet stipendija za studente - kazao je Kukić.





Odobrene stipendije isplaćivati će se iz Fonda solidarnosti u ukupnom iznosu od 1.000 KM za osnovce i srednjoškolce, odnosno 1.500 KM za studente.

Stipendisti će novac dobiti u deset mjesečnih rata tokom akademske 2017/18 godine.

Novčana sredstva koja rudari dobrovoljno odvajaju svakog mjeseca u Fond solidarnosti pronašla su put do onih kojima su zaista i potrebna. Ovo je jedan od načina da djeca umrlih i poginulih banovičkih komorata sa što manje materijalnih poteškoća završe svoje školovanje.

Fond solidarnosti osnovan je 2016. godine i već drugu godinu za redom dodjeljuje stipendije te tako pruža direktnu podršku i pomoć ovoj populaciji.



POLUGODIŠNJI
IZVJEŠTAJ
ZAŠTITE NA RADU

SMANJEN BROJ POVREDA U ODNOSU NA PROŠLU GODINU

Prema šestomjesečnom izvještaju Službe zaštite na radu, razmatranom od strane Uprave i Nadzornog odbora Društva, opšte stanje sigurnosti u svim organizacionim jedinicama Rudnika je na zadovoljavajućem nivou. Evidentiran je manji broj povreda u odnosu na prošlu godinu.

U prvom polugodištu ove godine zabilježeno je 98 povreda, od čega 82 lakše i 16 težih povreda, što je za 11 povreda manje u odnosu na isti period prošle godine.

Najviše su se povrijedivali radnici na radilištima u jami, ukupno 59, a od toga samo 3 na mehanizovanom širokom čelu, što je dokaz da savremena mehanizacija uveliko pokazuje svoje prednosti.

Rudnik „Banovići“ važi za jedan od bezbjednijih rudnika u FBiH jer nesebično ulaže u sigurnost radnika i opremu koja olakšava rad. Iz godine u godinu u ovu svrhu izdvajaju se sve veća novčana sredstva.

U cilju daljeg samnjenja broja povreda u narednom periodu najavljene su pooštrene mjere na terenu kada je u pitanju sigurnost radnika, a redovno će se

kontrolisati i korištenje propisanih ličnih sredstava i opreme.

U prvih šest mjeseci redovno su vršeni pregledi i kontrole sprovođenja propisanih mjera iz oblasti protivpožarne zaštite, zaštite životne i radne sredine, kao i kontrole tehničke dokumentacije u svim organizacionim jedinicama Rudnika. Tokom kontrole inspeksijskih organa utvrđen je manji broj primjedbi koje su u vrlo kratkom roku i otklonjene. Konstatovano je da se stanje zaštite i očuvanja životne sredine poboljšalo, te da je narušavanje istih svedeno na minimum.

Na vrijeme je lokalizovano i 12 početnih požara, koji nisu izazvali veću materijalnu štetu. Bitno je istaći da je u odnosu na isti period prošle godine broj požara u ovoj godini manji za 13.

Navedeno je i to da su poslovi u svim organizacionim jedinicama Rudnika rađeni u skladu sa odobrenom projektnom dokumentacijom, na osnovu godišnjih i operativnih planova rada. Za naredni period najavljeno je poboljšanje uslova rada i dovođenje na veći stepen sigurnosti svih segmenata zaštite na radu.



RUDAR informativna novina radnika
RMU "Banovići" d.d. Banovići

www.rmub.ba

Uređuje Redakcioni odbor:
Samir Numanović, predsjednik
Amela Kantić, urednica
Melisa Čaušević, novinar- saradnik
Fertik Glibanović
Amir Halilčević
Salko Gutić
Šehval Lapandić

DTP i štampa: "OFF SET" Tuzla
Riješenjem Republičkog komiteta
za informacije broj 04-651-537/77
od 6.9.1977.
List je uveden u Registar štampe R BiH.
E-mail: kontakt@rumb.ba
nadzorni.odbor@rumb.ba